

惜
抱
軒
文
集

惜抱軒文後集九

墓誌銘三

抱犢山人李君墓誌銘

并序

自劉海峯先生晚居樅陽以詩教後進桐城爲詩者大率稱海峯弟子然吾謂爲詩自有性情非其性情雖學不能善李君僊枝字寶樹遊海峯之門學其詩而似之孤介自喜爲縣諸生早棄去科舉學在家爲園池植竹樹自娛稍稍積錢卽出遊覽山水遠絕城市其性情真詩人矣乾隆五十八年余在江寧君忽至問所自來曰偶思洞庭及錢塘西湖因遊月餘塗間未嘗與人談話

今將歸過此來見君耳因邀余至其家後余歸里以君
居抱犢山去城猶百里餘未及往也而君旋卒卒後君
從子宗傳述君意欲余志其墓余以君之可稱述者如
此因許銘之君祖熙載父光璐娶王氏卒於嘉慶元年
三月十一日六十四歲抱犢山人其自號也銘曰
大江之北浮渡之東抱犢窿崇是爲詩人之幽宮林高
谷空寥寥冷風如或吟嘯於其中

孫母許太恭人墓誌銘

并序

太恭人常州宜興許氏女武進孫氏婦考諱建康熙辛
卯科舉人廣西義寧知縣舅諱謙康熙辛未科進士禮

部主客郎中夫贈中憲大夫諱枝生主客之第三子也
少而父母皆喪其兄鳳飛爲恩承州吏目攜至廣西義
寧見而愛之遂以女與之爲贅壻於義寧官舍二年生
子孝勳又二年贈中憲大夫卒時恩承已前薨矣而義
寧無子度兩姓後皆無依頗欲奪女志太恭人以死誓
且曰女在何不若兒耶數年義寧卒於官太恭人奉父
夫兩柩踰嶺嶠沿湘越洞庭歸於江南訪求武進孫氏
僅一宅而五世同居之太恭人分有敝屋兩間而已以
宜興贈嫁田易之於武進得二十餘畝不足供食於是
晝則紡織針黹以助食夜則課子讀子有過必撻之撻

畢必大慟其後孝勲中乾隆丙子科舉人又後十年得
句容教諭太恭人從武進至句容乃命以武進田爲祭
田曰子有薄祿吾田宜奉公矣又後二十三年孝勲爲
河曲縣知縣其時太恭人之孫星衍以丁未科一甲第
二名入翰林矣太恭人乃從居京師其後星衍爲堯沂
道孝勲亦請告從太恭人居山東後星衍以母喪去官
再起爲山東督糧道太恭人乃又與子至德州嘉慶十
年六月十九日卒於德州官舍年九十八其平生嚴整
不苟言笑而御下和恕未嘗以重語詈之體素健彊常
星衍去官居金陵燕山侯祠祠有假山小樓太恭人年

九十矣時輒不杖登之至於終壽而神明不昏也居武進時歸葬其父宜興母亡又葬其母及子孫旣貴矣命買田宜興供許氏祀而孫氏家祭後必祭許氏以報義寧德焉始以節孝舉得旌表卒以子及孫貴累封至太恭人子一孫三星衍星衡星衢嘉慶十年十一月日孝勲葬之於武進夾巷口祔於贈中憲之墓桐城姚鼎爲之銘銘曰

懿女少罹淳閔酷矣秉節濟危峙斃獨矣忍寒與飢命子穀矣天褒以壽康食祿矣同穴於茲貽裔福矣

王母潘恭人墓誌銘

并序

潘恭人者通政司副使王公友亮之配也通政家本婺源而居江寧故娶於江寧潘氏贈武德騎尉安慶衛守備朝士之女年十八歸於通政事公姑能恭以承意事夫能任家事之煩俾通政得專力以成其學行當通政仕於京師時通政母林太夫人在堂恭人侍之於家代通政之孝養旣而林太夫人就養於都而恭人以子女衆多婚嫁未畢尙留里中王氏故富室也及通政仕而家已落官愈進則貧益甚然人猶以富家期望之惟賴恭人拊搗經營以供京師及里中之用其所任有甚難者通政於乾隆六十年以給事中巡視南漕至陽州恭

人乃一往揚州蓋夫婦不相見者十八年矣於是始一
遇而逾二年通政卒於官矣恭人三子時長者行恕旣
喪次麟生終父喪旋亦喪恭人撫兩嫠婦及季子諸女
悲哀勞苦整理其家常如一日自奉極薄而與人惟恐
不厚年旣老而早暮治事如少時凡姻親中外見之者
未有不歎其賢而愍其瘁也又後將十年季子鳳生乃
仕爲浙江通判三署府同知恭人從之官廨於嘉慶十
四年十一月八日卒於杭州年六十九恭人事佛甚謹
而慈仁恭儉出於天性喜言人善間有言人過者必正
色止之雖婢僕未嘗重詈也六女皆適士族其季庶出

也恭人愛之甚以亡而慟故病遂至亟有孫一世林孫
女四曾孫二當通政之亡孺爲之銘墓矣嘉慶十
月 日其家將以恭人合祔復請銘焉其家世已詳
於通政銘內者茲不復具云銘曰

賢者勞智者憂男外勤女內修懿恭人敬有謀視室中
有與不厲黽勉靡安媼昌厥家貽多休惟母德不可酬
銘厥藏慰明幽

張母鞠太恭人墓誌銘

并序

太恭人淮安鞠氏候選州同知諱文燦公女年十六歸
於嗣山張氏贈中憲大夫彰衛懷道故宿北河營守備

諱瑞贈中憲適夫人王吳兩恭人皆先喪無出而有母王太恭人惟鞠太恭人至能敬事以助中憲之孝生子裕慶十一歲而孤卒能教督以成其才仕至河南彰衛懷道而太恭人被國恩晉封焉始贈中憲復有歸陳兩孺人各生一子一裕福彰衛兄也一裕臣彰衛弟也皆緇緇喪母太恭人撫育教誨其意誠至三子若一其後又成就福與臣之子皆並登仕籍矣當贈中憲之亡家貧子幼太恭人茹苦勤力守之以至子仕既貴而飭躬如故戒約其家勿侈費至於施予親族內外則以時而加豐惟恐弗至平日愛子甚篤及裕慶以逆匪自

川陝擾及河南從巡撫入營壘擒捕勁寇如是者三年
太恭人時勉以盡力效忠而已母念已也河南屢被河
患裕慶以府通判莅功防護及治衛家樓河口險工尤
勞瘁太恭人勉諭之終不及私故子之績成官擢而封
加母氏世以爲宜太恭人壽至八十於嘉慶十二年九
月二十五日卒於彰衛道官舍裕慶自銅山遷居金陵
故於嘉慶十三年十月十一日葬太恭人於上元縣東
五十里張官山之陽以狀示姚鼐請銘太恭人一子得
一孫保成方幼一女適宿遷附學生羅璞璞之子紳從
鼐遊又鼐有叔嘗從居彰衛官所甚久夙聞太恭人誠

賢如狀故爲銘曰

儼其秉德賢以壽子爲國材用未究恩褒母氏壘且厚
金陵東南鬱深秀蒼山四周中一阜卜萬世藏昌厥後
太子少保兵部尙書總督江南河道提督軍務兼

右副都御史徐公墓誌銘

并序

公諱端字肇之湖州府德清徐氏曾祖庠生諱元臣祖
舉賢良方正岷州知州諱志丙考涉縣知縣候補府同
知諱振甲三世皆以公貴贈太子少保資政大夫公生
而強記明達涉縣贈資政公始仕江南知蕭碭清河縣
皆臨河公年二十從官佐治於隄防疏導之法身習心

解及從之涉縣助挑引河工竣先諸吏阿文成公奉使
在河上見以爲才公於例應選通判卽奏留於河東河
工遂補蘭儀通判逾三年蘭儀改爲同知官卽以公升
任調睢寧及開封下南河同知其間屢遭大河漲警塞
禦得宜河南稱其績乾隆五十八年大計薦卓異護開
歸道印值湖北邪教爲亂從河督帶兵赴湖北界防堵
有功 賜戴花翎旋以江南總督兩河督合請以公署
充沂曹濟道其年睢州河決曹州河涸公豫築河北兩
壩以待水至及睢州決口合河至曹漲甚賴壩以安

今皇帝親政公引

見以知府用其冬授饒州府知

府江南總督河督請調淮安府旋加道銜逾年擢淮徐道值改淮徐道專轄徐州公居任遭贈資政公憂其時河南衡工河決 上憂河事甚 命回籍治喪百日

回徐州道任其後令以三品頂帶署河東河道總督公至衡工決口初塞善後之政皆公籌也是年冬卽補授江南河道總督逾一年 上命設河督正副官以戴

均元爲正督以公爲副逾二年戴公病歸公復爲正其年冬又改爲副逾一年裁副總河而公復爲河道總督公自嘉慶十年居江南河督任至是六年明習河事授吏程功贏絀必如所計躬耐勤苦以趨險急賴以安者

屢矣時有議改河入海之口者公往相視以爲不可迄
今河入海循故口甚利皆公識之當也然而大河多變
非盡人力所可施而國家以河淮濟運泛濫或引濁
入清漲急或權輕重決彼隄以保此岸於河道民居安
得無傷故公之才與所處之難皆上所深悉也而

國有正法在任值有河患安能引天災而不爲法受過
故嘉慶十五年冬遂令去職仍留工次公於是每遇要
工必以身先衆次年冬以治礪山李家樓決口旁開引
河公任其事嚴寒積勞遂至病甚世謂使其功完事定
天假之年必復爲上所褒擢而公竟不能待然其

所已見於世者亦可稱矣公著有迴瀾紀要安瀾紀要
二書年十二而妣錢太夫人喪與母弟妹甚友愛及贈
資政之亡遺庶子及兩女皆幼稚公撫之懷惻恩勤尤
至見者爲感動焉夫人蔡氏生二女側室張氏生一子
鏞女謝氏生一子鎖女公年六十二以嘉慶十七
年四月初六日卒以嘉慶 年 月 日葬於

銘曰

河流渾渾東屈淮濱朝治而平暮忽改奔效功以人底
績者天佑維徐公 國之勞臣載任水官三十其年有
勤其襄有資以安鬱蘊餘志曰瘞茲原

贈奉直大夫翰林院編修加三級鄧君墓誌銘

并序

君諱巨源字崑發其先高密鄧氏遷居閩宋建炎初有
左正言肅以直言著於宋史其後世屢遷明末居壽州
入國朝有順治丙戌科進士陝西洮岷道按察副使
旭始自壽州遷爲江寧人生貴池訓導煊煊生廩膳生
重及堪重無子以堪子附貢生贈編修鑽嗣是爲君考
君生而好學能文爲江寧府附學生爲人孝弟恭謹其
父晚病偏枯侍疾不離側扶持抑搔數年不懈父以爲
安教子嚴必使近正人延其從叔某爲授讀禮敬甚至
後某老矣無嗣君朝夕饋之食其於宗黨戚友多施惠

君年五十五。於嘉慶元年五月卒。娶陳太宜人。同縣歲貢生延年之女也。君之事父母。爲善太宜人能盡力以相之。君族叔某喪於君亡之後。而終不失奉養之宜者。太宜人力也。持家勤苦儉約。及子旣貴。猶不改勗。以廉正而已。年六十九卒。於嘉慶十七年二月。生二子。長廷楨。嘉慶辛酉恩科進士。翰林院編修。寧波府知府。君考及君。皆以廷楨在。編修任得贈奉直大夫。翰林院編修。加三級。君妣彭太君。贈太宜人。陳夫人。封太宜人次。廷樑先卒。女一適王世琛。君亡時已從葬。考墓於江寧城南矣。及太宜人沒。嘉慶十七年十一月日合祔。

延楨乞姚鼎追爲銘銘曰

篤行好善生抑弗顯其卒光衍懿媛在闕佐志繼緒同
藏鞏榘

周青原墓誌銘 并序

乾隆三十年春

高宗純皇帝南巡江浙合江南

士之獻進賦頌者召試於江寧自十六年

南巡至

是三召試士矣是年定爲糊名閱卷取中尤嚴而江寧

周君以廩膳拔貢生入試

欽定爲一等

賜舉

人授內閣中書舍人君之名乃大著於天下君入都供
職旋入軍機處辦事一夕內直 上偶問得君名

歎曰此吾南巡時所得江南才子也時大臣無不欽重君者君兩會試未第倏挂吏議君時年才逾三十耳而意沮喪無仕進之志君故通曉天下利病又善爲文奏旣退閑於是四方督撫多請君入其署爲章奏而君亦藉以遨遊徧天下當君之得過以人有來探事者君對不知後其人得罪引君及同直軍機者皆未泄密也吏有與軍機官相惡者卽以不嚴斥探者傳重比鐫級其後與君同罪者復進用至卿貳而君獨遠迹都門雖其居幕府爲奏之善多爲天下稱誦而身一見枉終放廢以至於老此天下所共慨惜也君諱發春字卉含其號

曰青原人皆呼之故青原之稱尤著余初於京師見之
其文章書法之美交遊中所希見而議論和平與人接
恂恂溫良人也余歸里主皖中書院君時來皖得再見
甚歡余後至江寧而君尙依君子之桂於皖遂不見而
之桂今以君柩歸矣君夫人沈氏賢而早沒生二子之
桂安徽候補知縣之桐先喪嘉慶十六年十月十日君
卒年七十四次年 月 日葬於江寧南吉山之麓
夫人沈氏先葬於是今以君合焉爲之銘者桐城姚鼐
也銘曰

才高不盡其能名著不究其升智可逮遠而身失其憑

惟其君子長者也卜其後之式承

中憲大夫杭嘉湖海防兵備道長沙周君墓誌銘

并序

君諱克開字乾三先世自豐城徙長沙明末張獻忠破長沙脅降諸生周繼聖至斷腕不屈者君五世祖也其四世孫宣智中乾隆甲子科舉人爲澧浦教諭以君貴贈中憲大夫君爲贈中憲之長子少有盛才後父一科而爲舉人乾隆十九年以明通榜引見發甘肅以知縣用授隴西知縣調寧朔寧夏之田竝河爲渠歲得河新水則腴得湖山宿水則饒且瘠故渠有引河之闢又

有洩宿水入河石竇民謂之暗洞君在寧朔值唐鐸渠
暗洞崩塞渠水不行上官從他吏建議填暗洞而竭唐
渠入漢渠以便寧夏之引河君念暗洞廢則寧朔水無
所洩夏秋水盛民且溺力請修復之夏民以爲農事近
新水將至不可待君約以五日爲之乃取故渠廢閘之
石晝夜督工五日而暗洞復立又嘗爲寧夏治唐延漢
來及大清三渠皆前吏治之無功者君受檄相度或濬
或徙至今民賴其利君再以卓異薦擢知固原州父喪
去官服終爲姚州知州擢都勻府知府調貴陽府在都
勻時嘗從巡撫與總督吳達善侍郎錢維城治貴州苗

民爲逆獲其首從鞠之君謂錢侍郎用法有不當者固
爭不爲下在貴陽亦以強直忤巡撫宮兆麟二公始皆
憾而卒以重君旋以公累解職引見復授蒲州府知
府調太原府大清積案修復風峪口隄堰障山潦而導
入汾始君在寧夏治渠作閘民謂之周公閘至太原民
亦德之於隄上作周公祠云擢吉南贛寧道署布政使
事以王錫侯書案被罪然高宗素知君賢吏也

乃發江南以同知用值駕南巡君以署江寧府見

上命知九江府擢浙江糧儲道又調杭嘉湖海防道值
改建海岸石塘君蒞其工總督欲徙柴塘近數百丈以

避潮君曰海不與河同徙而讓之潮益侵無益也力爭得止君督視勞甚致疾然猶不懈有任年餘以乾隆四十九年七月二十日卒年六十一君生平所莅官皆有績善治獄多所平反禮儒生以私錢興書院而性尤廉其授糧道盡革舊徵之濫而身與上官約不取一錢之賄上官故移之海防也沒後家無餘貲娶張恭人先卒生子有聲乾隆六十年進士貴州大定府知府次有度早殤女三側室童氏生子有蕃國學生女一有蕃年未三十而卒君與張恭人合葬本邑河西鄉蘊玉山嘉慶十年有聲將復治其墓桐城姚鼐銘之銘曰

矯立其義惟堅以毅惡恤子忌奮喪民事辨害興利河
瀟海濫方略載備衆曰君恃生爲良吏沒而民祀貽庥
厥裔銘告千禩

中議大夫兩廣鹽運使司鹽運使蕭山陳公墓誌
銘 并序

公諱三辰字北樞先世居義烏自義烏遷山陰之臨浦
鎮鎮去蕭山城二十里居者多貫籍蕭山故公六世祖
至公皆稱蕭山人曾祖嚴州府教授贈奉直大夫諱正
治祖縣學生諱常敬考金壇縣知縣諱逢霖祖考皆贈
中議大夫公少爲蕭山縣學生援例爲安徽縣丞升鳳

陽縣知縣以獲鄰州巨盜升府同知借補亳州知州亳
巨州也訟者日進狀數十公得其狀卽詆卽判逾月訟
者稀半年則解矣乾隆四十九年河南柘城民王立山
爲亂距亳州百餘里公聞卽募鄉勇得千餘人練習之
河南官兵爲立山所敗公度立山必至設伏路左右而
自待於城外立山入亳州境見無備易之趨城忽見兵
駭而戰伏起蹙之衆遂潰生禽立山其年安徽大饑上
官令亳州設兩粥廠以賑公計一州兩廠何足贍饑者
自增三廠分設境內又收民棄男女者集於佛寺令一
老嫗撫孩幼十如此數十處身時周巡其間計其費上

官發銀曾不及半移用以濟之人謂如此終必以虧庫銀獲罪矣公曰活民而得罪吾所甘也當公禽王立山時大學士文勤公書麟方爲安徽巡撫至亳巡其戰處太息曰君將材也及覩賑民增厥愈賢之令藩司盡補公所費公以無累世以此益稱文勤爲知人也而總督不喜公奏禽立山事不敘公績

純皇帝見奏以

理勢隱度知公之賢卽令引

見加直隸州公旋知泗

州時書文勤爲總督保升知府引

見授常德府知府

調長沙府會征鎮筸苗亂公總理糧餉隨戰於平攏大捷加道銜嘉慶四年擢廣西右江道屢署布政使按察

使十一年大計卓異十四年擢兩廣鹽運使公才高識遠遇事陳說慷慨屢署兩司勞於吏事及授運使事逸而衆所利也公遽以老疾請辭職以去仕安徽時買宅江寧城內及謝官歸江寧令諸子出仕自穿池種花竹時會故人君一日謂姚鼐曰吾死君當爲吾銘墓卒前一夕召客飲酒劇談夜端坐而卒爲嘉慶十七年五月二十五日去官三年矣年七十有七先娶孫夫人生一女卒繼娶方夫人生四子一女子候補知縣星珠府通判星華布政司庫大使星軫布政司經歷星景側室王氏生一子未入流星德以嘉慶十年某月日葬

姚鼎銘之銘曰

仁及於民法可遠施功著於時中蓄餘才任於繁勞去
彼膏脂惟以明智蹈夷遠熾清曠江城終以懌怡

奉政大夫順天府南路同知歸安沈君墓誌銘

并序

君諱錦字中甫歸安沈氏自宋元有聞人矣君之高祖
鉞貢生贈湖南按察使以德祀於鄉賢祠曾祖慶曾康
熙庚辰科進士四川會理州知州祖世杓康熙甲午科
副榜江西崇義知縣父麟炳增生祖父兩世皆以君貴
贈奉直大夫薊州知州君少以文名以庠生中乾隆己
亥恩科浙江鄉試以舉人直四庫書館敘勞以知縣

分發直隸授蠡縣長垣知縣嘉慶三年大計舉卓異擢
薊州知州旋病後痊引見 上命往陝甘以知州

用時直隸總督知君賢習直隸事奏留於直隸補安州
知州州數遭水患有田畝久沒水者賦額猶存君履視
知其病固請於上官奏除之嘉慶十年擢順天府南路
同知南路所轄七州縣民俗悍而健訟君恩威兼施能
燭其姦竇俗爲之戢又兼署治中府尹每倚君以治事
畿輔殷繁君明習於事而敢任之勞憊益甚嘉慶十四
年君六十有七矣遂堅以病辭任君仕終始在直隸直
隸民佩其德者甚多其尤著者始署大名縣值段文京

亂後捕餘黨安良善最有鎮定之功在蠡縣潞龍河漲欲決隄矣君盡力護之身立風雨隄竟以固以艱去蠡民泣送者塞路過清苑忽有數十人素衣來拜送者問之皆君在省讞獄所平反人也藁城嘗被灾吏散賑不善飢民怒噪欲死其令省中或議以兵往君謂必不可自請單騎往諭散其衆入城摘令印坐廳事決胥吏數人定其賑事一縣遂以帖然君之謝病也其三子惇厚方知雄縣乃赴其官舍其次年四月晦卽卒於雄縣年六十有八夫人長興朱氏爲歲貢生贈奉政大夫克州府同知謙鏊女溫惠賢孝君少而爲客四方壯而在官

而卒不以家事累其心者夫人力也諡封宜人嘉慶十七年九月二十八日宜人卒年六十有九生子四長育乾隆乙卯科順天副榜杭州府訓導次敦獎兗州府運河同知次敦厚雄縣知縣次敦典嘉慶戊辰恩科舉人女二長壻嘉慶辛未科進士庶吉士吳縣戴葆瑩次壻候選主事青浦徐光燁孫八人以嘉慶

日合祔於

山銘曰

沈族武康蹶興南朝誕暨今時播聞益昭君始文士起膺吏事功載紀能庶民懷懿輔於畿南劇殷是堪歛翮退飛不究所覃莘莘賢子繼爲國才懷槩操符駢秀聯

瑰亦有魚軒內修其德同廟嘉壤貽庥千億

贈奉政大夫刑部郎中南昌縣儒學教諭鄱陽胡

君墓誌銘

并序

君諱祚安字紹遠其先世居婺源有胡學爲唐散騎常侍學之後十餘世遷居樂平又數世遷鄱陽琳橋里當明季有諸生居晉君之曾祖也君祖諱文炤入國朝爲居士考諱世高以君仕時贈修職郎以孫克家貴累贈中憲大夫惠潮嘉兵備道君之妣曰詹恭人生二子伯常及君而殞繼妣徐恭人生子濟民贈中憲暮年得風痺病臥起待人扶掖君時尚幼人塾讀書稍聞歸侍

疾左右甚得其宜勤苦無倦色見者爲悲之及旣孤兄
弟相依力學奉母其季弟尤聰慧君自課之誦讀愛友
甚至而季弟竟以羸喪其時徐恭人有喪明疾又遭愛
子之殞不勝其痛君承事婉至苟可以慰親者竭盡其
力無勞與難於是已中子爲季弟後自是數十年奉
侍安養徐恭人以終君篤學工力爲文旣冠爲鄱陽學
生中乾隆二十一年江西鄉試屢試禮部不第卒乃授
南昌縣教諭君平生爲已及語人皆以敦行爲先而後
及於文藝及爲師儒之官尤以是爲訓從遊聞其言者
多有動焉當四庫全書館之開 朝廷蒐求祕書而因

有以藏違禁書相告訐者亦有本非違逆而姦人以妄
詆所怨牽致官所人心惶惑君承上官檄主其事乃開
示條目分別應呈緘毀與否人遵其教數旬而畢無被
罪者衆以謚寧南昌有爲匿名書謗豫章山長張之衡
其山長意疑爲某兩生也告巡撫褫兩生攝罪之君知
其枉辯於上官未許君執之益力兩生卒賴以全君遇
事能別白是非又堅定有守雖職卑所及不廣而所用
意有足稱矣君卒於乾隆四十五年六月年五十三娶
童夫人生子四長國子監生克恭次廩貢生候選訓導
克勳次乾隆庚子恩科進士今安徽巡撫兼提督軍

務克家君所命爲季弟後者也次侯選知州克健孫五
曾孫一君始亡浮屠於里今獲卜兆於縣山之原
嘉慶二十年 月 日遷窆於是桐城姚鼐爲之銘曰
有懿修士操始孝弟婉愉在室祥被門外以儒爲官亦
正厥誼載施未閤餘慶斯大繩繩後賢卜茲松隧迺鞏
幽藏降嘏百世

實心藏銘

并序

實心藏者兵部尙書總督浙閩軍務桐城汪公之生壙
也公自言平生惟矢心去妄而存實焉此念無間於終
身故以名其壙且著說以示子孫以謂歿且不棄實心

況生者乎又以說寄同里姚鼎使爲之曠銘鼎謹案公
名志伊字稼門以乾隆八年正月 日生年二十九
中乾隆辛卯 恩科舉人其厯官爲靈石知縣霍州知
州鎮江蘇州知府蘇崧糧道江南按察使甘肅浙江布
政使福建江蘇巡撫工部尙書湖廣浙閩總督其政績
之美甚衆而其尤著者山西有孟木成者爲人誣以殺
死張光裕一省之官皆定爲情實矣公驗其兇刀甚小
與傷痕不合所序情節甚乖舛執以爲誣 欽差至猶
頗以釀衆案爲難也公辨之詞證明而義堅正木成卒
得生公名由是大起東南之潛爲天下至重公爲糧道

及浙藩尤能清理之使輸者不困而官運充自昔江漢
沃溢沈浸民田或數十年且數百里公督湖廣時奏請
建閘清河而建立隄工親往督視用財實而工鞏至今
爲利其察江盜尤嚴密法當而令行及在閩治海盜事
皆整辦江海行者靡弗頌焉其自勵訓士及誨其家子
弟一皆出於儒者之正義而歸於實心則公所自得之
要也是藏成於嘉慶二十年公年七十三矣雖謂古人
多以垂暮之年復大建勳業若漢趙營平宋文潞公皆
以八九十而更有事功載於史傳今公雖逾七十而精
神尙健足爲國任前日之事可書後日之業吾不能

紀然惟一以實心之道成之則事雖未見理則可明大
人君子之道一於誠而已以是作公藏豫銘可也公會
祖諱 祖諱 考諱 皆以公貴贈資政大夫
妣皆贈夫人公夫人姚氏先卒已別葬子 孫

銘曰

國政巍崇寢食之細悉以誠將一言可蔽猗惟汪公名
德重臣塞淵其心自矢畢身其行未央焯其已見銘告
千祺爲士林勸

惜抱軒文後集十

記

晉鎮南大將軍于湖甘敬侯墓重修記

晉丹楊甘于湖敬侯卓初起有平石冰陳敏之功逮元
帝太興中屢著勞績封于湖侯爲安南將軍梁州刺史
假節鎮襄陽有惠政於襄陽及王敦稱兵爲亂任露檄
致討聲動京師事皆詳於晉書本傳當王敦逆志方盛
下據石頭兵勢旣振矣然止於殺周顗戴淵而退終未
及篡代者畏侯據其上流其露傲遠近足以聳其氣也
然則侯雖被害於敦不獲以功名終然固可謂人有造

於王室矣其喪後歸葬丹楊迄隋滅陳廢丹楊縣析丹
楊北境入江寧故侯墓今在江寧界人呼其地曰甘墓
岡甘氏居其側者尙有數百家云皆甘侯後也墓碑中
失有鉏地者得碑曰梁州刺史甘府君墓乃復辨之然
墓崩壞屢修不固嘉慶十六年裔孫福字夢六出財修
之於墓門之前環巨石爲址可以歷久不圯乞余爲記
自余來江寧欲尋晉室建平諸陵及當時名賢墓隴如
李白所云衣冠成古邱者皆漫無其迹矣惟甘于湖敬
侯及卞建興忠貞公墓修整可瞻良以兩公皆有子孫
恒依此土時省飭以彰前列之賢此固考古思德者所

爲深幸矣而夢六追遠致恭之意亦足稱也嘉慶十六年四月 日桐城姚鼐記

安慶府重修儒學記

代

古有成均鄉黨州閭之學而無祀先師之廟釋奠則於學設席以祭祭而徹之後世學廢而孔子之廟興至宋乃因廟爲學自元明至 國朝悉因其制觀仰聖人以啓學者效法之思制異於先王而意未嘗不合也安慶府治始於南宋嘉定年黃勉齋先生之所營建意此府學之興亦必始勉齋矣恭維我 列聖御宇以朱氏之學訓士而勉齋朱子之高弟也其守此郡以朱子

之學教於一方雖當時支撐江淮戎馬之間不竟其志
事而其意可思也昔當朱子時有象山永嘉之學雜出
而爭鳴至明而陽明之說本乎象山其人皆有卓出超
絕之姿而不免賢智者之過及其徒沿而甚之乃有猖
狂妄行爲世道之大患者夫乃知朱子之教之爲善也
近時陽明之燄熄而異道又興學者稍有志於勤學法
古之美則相率而競於考證訓詁之塗自名漢學穿鑿
瑣屑駁難猥雜其行曾不能望見象山陽明之倫其識
解更卑於永嘉而輒敢上詆程朱豈非今日之患哉安
慶府學厯代屢有損壞脩復今某來撫此土又值其年

久功弊乃合官民計量出財而脩之自嘉慶十三年
月起工至次年 月畢工用銀一萬 千 百兩自大
成殿外及門廡階砌及旁附祠廡不整飭吏民請紀其
事余幸當海宇清晏庠序大興之日臨勉齋之舊治仰
企勉齋道德渺不可追惟近推 聖天子崇教之心
而遠循朱子勉齋之舊訓願諸生入是學者一遵程朱
之法以是爲學毋遷異說至其修建興革之細碎者則
不足載云

重修境主廟記

龍谿水出羣山之中衆谿交絡匯而奔出龍眠之口橫

嶂塞谿隘是建境主之廟唐中葉桐城丞張公孚卿有
德政於茲邑歲旱禱雨水大至溺焉縣人思而祀之於
此謂之境主自唐至今廟或圯敝民輒新之豈非賢者
之澤垂留者遠而愛慕者深哉嘉慶十三年歲大水潛
霍山中蛟出毀田廬殺民人患甚劇而桐城獨免民尤
以謂張侯之庇我也其祠有損壞者衆出財脩而新之
是年秋末余自江寧歸往遊龍眠策杖渡谿水至公祠
下瞻新宇之旣成同衆仰戴公之無數也遂書爲記云

萬松橋記

徽州之縣六其民皆依山谷爲邸舍山谷之水湍悍易

盛衰爲行者患故貴得石橋爲固以濟民吾至徽州觀其石梁之製堅整異於安徽他郡蓋由爲之者多石工習而善於其事故也黟之東南有葉邨邨北大溪東流達休寧漁亭以合新安江水邨東西各有小溪北流入於大溪兩小溪上有石橋四皆葉君廣芥一先人之所爲也而大溪曲當邨口有萬松亭亭側架木溪上爲橋曰萬松橋時爲大水決去邨人病之欲易石久矣然其功巨不可就乾隆五十三年夏徽州蛟水發葉邨之南山崩地壞田廬毀橋岸其後數年民脩田廬旣飭而山之崩壞未復地脉虧敗葉氏以爲憂羣出財脩之衆舉

葉君掌其事。壘石培土山之形勢不逾月而完。餘銀數千兩。衆喜復請君輩爲石橋於邨口。當昔蛟水之發山隕一巨石於地方三丈餘。葉君視其質堅而理直。取爲橋材。嘉慶七年九月橋成長十二丈。廣丈六尺。高如其廣。仍名之曰萬松之橋。猶有餘石與銀。葉君使工復爲石橋於其溪之上。流曰西閘橋。而邨之左右舊橋盡脩而新焉。當蛟起之年。余適在歙。見被害者之遠且巨。甚可傷痛。今葉公爲橋乃反因其隕石之力。因禍爲福。轉敗爲功。豈非智乎。余嘉葉邨之族不吝財以營公事。而又得葉君之誠篤而明智。善任其事。以督之。故衆工無

不舉是皆足書也嘉慶六年八月桐城姚鼐記

節孝堂記

國家於女子節孝著聞者有旌揚之典有列女之祠所以表章潛德風勵閭閻者蓋至矣然天下賢女秉節守道或實可貴而於旌表之例有不合抑或身亡無後及有後而衰困羸弱不能舉報其爲懿美吏不能知若是者亦有之是以江寧孫生金相作節孝備考錄以廣旌典所未及者其書夙爲節使守土諸賢所稱善矣惜孫生蒐舉未已而身泯喪江寧士大夫皆欲依其法考詢而增益之郡中故有恤嫠公局今司其局者就其堂爲

錄中節孝祀所地狹不能人立一位乃合作一神牌而
列書之春秋得展禮焉名其堂曰節孝之堂其續有稱
舉可徵者同人爲核實再刻續編而後書之以防遺濫
余登其堂嘉諸君之誼輒書以爲之記云嘉慶十一年
五月五日桐城姚鼐記

寧國府重脩北樓記

佳山水名絕著爲古今賢士君子所頌歎四海之內可
百餘區雖其所以稱盛之故大體略同而其間各負絕
異之境非人意度所至有必不可以相似之地儼而一
之者此天地之文也君子因所身遇覽天地之至文以

養神明之用是爲智而已若夫較量優劣之論則智者
所不爲余素持是論往時丹徒王禹卿侍讀最取其說
而稱之今夫江以南列郡之名樓鎮江有北固寧國有
北樓其山勢皆自南入城陂陀再聳樓當城北而面南
山此圖可傳言可著者也而其各有獨絕之異境非親
覽不知圖與言不能具也而此二樓皆在太守署內余
嘗數至丹徒不識其太守不獲登北固幸識寧國太守
魯君矣而余足迹未至宣城二地之勝故皆想慕而不
見焉嘉慶十一年魯君爲守之三年治內謐安惜故北
樓之頽敝命工飭之旣竣以書告繇使爲之記余謂君

賢明仁決善吏事而能文章可謂智者也又王侍讀弟子家於丹徒而臨宣州其成是樓也余雖未登而能用吾意以觀於其間將以踰越謝元暉李太白之所舊得者非君而何爰書以爲之記君名銓乾隆庚戌科進士其樓之落成在嘉慶十一年 月桐城姚鼐記

遊故崇正書院記

江寧城西倚山古因其勢作石頭城今古城盡變而石頭之一面不改也不石頭城內清涼山巔有翠微亭南唐暑風亭址也亭下稍西有僧寺南唐所爲清涼寺也寺之左明戶部尙書耿定向爲御史督南畿學時建正誼

書院於此迄張江陵柄國毀書院江寧諸生改爲祠以
祀定向至國朝祠亦頽敝矣今釋展西居之飭脩其
祠宇具完因建前後屋以奉佛居僧而俗猶因故名呼
曰崇正書院其前有竹軒窈然幽靜可以忘暑後依山
作小室丈許啓窗西向則萬樹交翳樹隙大江橫帶明
滅其間爲登覽之勝余來江寧每裴裒翠微亭畔四望
曠邈輒回憇其室展西亦喜客來具茗食相對今年余
與太倉金麓邨錢塘葉心畊至者再矣展西欲余有紀
因書以遺後來遊者俾有考焉嘉慶十三年三月晦日

記

甘氏享堂記

先王之禮墓藏而廟祭戰國乃有祭於塋間至漢時而有塚舍蓋原涉以塚舍著名於哀平王莽之世夫有祭則當有舍原涉特以舍之僭侈逾於常人耳計當時塚之有舍非第涉也至東漢而謁墓之禮上自天子下徧於士大夫之家此後世因俗制宜使先王復生必以爲不可廢也江寧甘夢六福爲晉甘敬侯之裔嘗修敬侯之墓余爲之記矣茲爲其先君葬江寧南靈母山之東北去城五六十里歲時省墓祭祀無所託居乃買田建享堂六間於墓麓之前復以請余余聞夢六之先君子

生有孝行而夢六繼之敬其於墓祀自遠祖及近皆有稱焉此固君子所樂予也因爲述古今之異禮而以當乎人心者爲貴乃復爲之記云

先宅記

鼎先世自餘姚來桐城始居麻溪南至八世葵軒公居栗子岡南十世芳麓公居城中天尺樓宅先高祖端恪公居北門雁軒曾祖居南門宅曰樹德堂麻溪南宅今猶爲世寬公後人居之栗子岡南宅其宅與田今屬中翰公房裕綸守其業堂懸芳麓公爲禮部郎時櫛尙存焉天尺樓宅至職方公令八房分居是宅以遺幼子故

至今爲第八房竹塢公後人居之天尺樓者其門樓名也宅最後居樓五間鐵松中丞截居樓爲職方公支祠乃與天尺樓宅隔分當芳麓公之世有鐵斧負木甌從空飛來其聲薨薨甌內蒸杭猶熱釜容四斗許今在祠樓上雁軒者端恪公買北門倪氏宅也自天尺樓宅徙居之後五房分居其宅亦以遺幼子故爲第五房朝邑公後居再世售於潘氏潘氏毀折雁軒而別構焉先曾祖羅田公自雁軒徙入樹德堂居四十年肅生於樹德堂八歲時宅售於張氏伯父太史公與先贈大夫乃徙北門口之宅曰初復堂今七十年矣宅少人衆不能容

必有徒隸因修譜併記先世宅於此以爲後人考信焉
嘉慶戊辰臘月朔肅記

朱海愚運使家人圖記

右圖一卷凡六人偉丈夫据盤石正坐長髯下垂者朱
海愚運使公也衣藍簪桂憑檻坐若有言者夫人梁氏
也左侍兩少年立稍前者公之長子字白泉者也後立
手執蘭麝進者公次子字蒼巖者也姆抱小兒帶銀環
倚檻右立者公孫奕勳也乾隆四十三年運使公年五
十在揚州兩子未仕甫得一孫使工畫其家人相聚之
像如此肅於乾隆十七年入都與公相知公時尙無子

也其後公仕蜀中余仕京師相隔數年公返乃復得見
公守泰安余解官至泰安歲暮風雪同登泰山夜觀日
出公自爲之圖及公至揚州邀余主揚州書院於是相
聚者兩年公旋病歸京師遂沒於京師至今日余不見
公三十四年矣而復展對公像爲之隕涕公夫人已前
沒次子蒼崕當得太守而亦病沒惟白泉再爲江南觀
祭與余相見最久爲出此圖其時白泉子奕勳爲山東
黃縣令有聲圖中之銀環兒也白泉復有三子二孫蒼
巖亦有子二人孫四人皆生於作圖後者家祚方盛可
慰公地下余獨追感今昔閱六十年有如此旦暮耄昏僅

存愴思冥漠因書爲置記云嘉慶十七年六月十七日
桐城姚鼐記

種松堂記

乾隆時宮保方敏恪公總督直隸居保定日念贈光祿
中翰公塋兆未定乃作白首歸來種萬松之圖自題詩
其上欲以身依先壟極悲思慕願之意云其後贈光祿
葬句容之葆山種松蓋不啻萬及公薨亦歸葬葆山之
東麓蓋公生未遂依壟之志而藏體於斯固亦可以安
公之靈矣又其後今南耦尙書以母吳太夫人亡葬之
葆山西麓蓋去宮保公作圖時五十餘年矣而長松茂

蔭蓋蔽巖嶂陰映雲霄十餘里外望之蔚然知爲万氏
阡也乃作堂以爲墓舍遵宮保之遺意名曰種松之堂
夫所謂故國者非喬木之謂世臣之謂也今尙書將以
功名繼宮保之後爲國楨幹而丙舍之護蔭於茲日
久日益然則睹喬木之盛而發世臣之思者其斯堂也
歟嘉慶十九年七月晦姚鼐記

餘霞閣記

江寧城西四松庵僧彌朗居也庵後倚山有軒南向本
民居衆買其地歸於庵方葆巖尙書嘗邀余登之喜其
崇敞而惜其荒穢也嘉慶十八年冬陶熙卿暨其從子

子靜樂庵居之靜乃出財飭其僦壤種卉木治石磴作
室爲陶氏讀書之所又於軒後爲閣三間西向臨江盡
收江南北之山於楹內觀於夕陽時尤宜俾余名之乃
取謝朓詩語以表其美且著閣所由始焉嘉慶十九年
二月桐城姚鼐題并記

祭文

祭方葆巖文

嗚呼世有俊民爲時而出宜壽以康盡其才實竟奪以
殞天胡弗卹惟昔恪敏績佐
高宗公孤髫年已
有父風占奏有儀見於
帝宮弱冠授官旋復登第

密勿禁闔決事靡滯出從戎旃遠踰西裔躋陟崑崙雪
霜所閉裁奏璫幄招戎馬蹕旁行書來受爲吾隸屢以
其賢見知

先帝

今皇親政方面遂膺疲羸

是撫亂略是懲汙至清夷治効益登建牙樹纛沿海南
憑鯨波颶風談笑載乘萬里臺灣如涉溝塍內治外攘
惠洽威棱爲臣則忠爲子則孝母老子遙陳辭內告

帝愍其忱朝請夕報奉母金陵寒暄蒞茝出入里閭
書生衿帽抑抑其心恂恂其貌惟太夫人旣終其壽

天子賜慰 命官奠酌公營壤兆積勞在疚嗚呼逮

今面鰥身瘦邁疾遂深不可療救 帝待公出作蕃

作相民望公來兩膏保障公亦自期終吾喪葬日月猶
長庶竭忠亮年未六十云胡泯喪要經未除淚容屬纊
公今往矣海內同情況在親舊嘗從朝夕樽酒言笑翰
墨間作鳳儀儼在睎思疇昔茹悲陳詞醉茲奠帛同饗